

REGIONAL NEWS

CM, FOREST

Chief Minister Pu Lalduhoma chuan hmasawnna hnathawh dawnah forest clearance lak zel a ngaih avangin, hmasawnna hnathawh chak taka kalpui a nih theih na'na lo tanpui thin turin environment, forests & climate change department officer-te a chah.

Forest department hnathawh dan thlirletna a inkhawm a telpuina-ah Pu Lalduhoma chuan Mizoram hian hmasawnna hmel thar hmu thuai thuai se an duh avangin hmasawnna hna thawh tur ruahmante thawk nghal zel a nih theih na'n forest clearance pek zung zung a pawimawh thu a sawi a ni. Department hotute'n an sawi danin kum 2023 December atanga atanga tun thlengin forest clearance 12 pek fel a ni a, project 5 a thuphunga pawm a ni tawh bawk. Project 3 chu pawm tawh sa, pawisa chawi tur ang la pek loh ani a, Project pahnih clearance chu sorkar laipui Ministry of EF & CC lam nghah mek a ni a, an dilna lehkhah a fel fai tawh loh vanga pawmpui tura nghah mek project pathum a awm a, Mizoram State compensatory afforestation fund management and planning authority CAMPA fund-ah cheng vaibelchhe 199 a awm mek a ni.

Chief minister chuan Project reng reng Planning Department hriatpui lo va kalpui an rem tih loh thu sawiin, Planning Department ah thlen zel tur a ni, a ti a. Department ten inhre tawn lova project inang tak tak te, inhnaih tak tak te an kalpui hian ramin a hlawkpui tur angin a hlawkpui loh phah thei, tih a sawi bawk a ni.

He department hnathawh thlirlet inkhawm hi Forest minister Pu Lalthansanga'n a kaihruai a, Adviser to CM Pu TBC Lalvenchhunga, Commissioner Pu H. Lalengmawia, Pu K. Lalthawmmawia leh Pu Vanlaldina Fanai te bakah PCCF Pu Rajeev Kumar Tiwari leh EF&CC officer te, Finance leh Planning Department Official te an tel a ni.

AYUSH

Ni 3 chhung awh tur National Ayush Mission Conclave chu Pune khawpui a Lonaval-ah Union Minister of State Prataprao Jadhav ho vin buatsaih a ni a. He hunah hian Zirtawpni khan Health Minister Pi Lalrinpuii bakah state hrang hrang Ayush minister leh official-te an tel a ni.

India ram chhunga Best performing state thlanchhuah zingah Mizoram a tel avangin Pi Lalrinpuii chuan Mizoram chu Ayush health programme nasa taka kalpuitu a nih thute, India ram state zinga best performing state an ni chu lawmawm a tih thute, Mizoramah Ayush dispensary engemawzat din a pawimawh thu te sawiin, hemi atana pawimawh leh tulte pe turin Central Sawrkar a ngen nghal a. AYUSH department hnuaia hmachhawp hrang hrang te sawiin, nitin Ayush inentirna bakah pawn lama damlo entirna an kalpui chu mipui ten a nhlut zia leh chhunzawm zel an tum thu te, mipui ten Ayush damdawi in an pan nasat tawh zia leh OPD/IPD patient an pun zel thu te sawiin, khum 10 awmna Ayush hospital hmun thuma sakna tur DPR cheng vaibelchhe 22 leh nuai 50 senna tur a thehlut nghal bawk.

He conclave ah hian Ayush hmachhawp hrang hrang leh health programme hrang hrang kalpui dan tur te bakah lian zawka state hrang hranga Ayush kalpui dan turte zir ho a ni a, Mizoram atangin Health Minister hi Ayush Deputy Director Dr.S.Mara Thansiami leh Ayush State Programme Manager, Pu Lalduhawma Chhangte an tawiawm a ni

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



LMC BoC

Lunglei Municipal Council (LMC) Board of Councillors (BoC), an Chairman Pu Lalzuithanga kaihhruai a Lungleia ṭhu khawm chuan tun tangka kum atana sum ruahman an pawm.

Zirtawpni a LMC BoC ṭhutkhawmah hian Finance changtu Executive Councillor Pu Zorinsanga Hmar-in kum 2025-2026 atana LMC sum hmuh dan tur leh sum hman dan tur ruahmanna, budget pharhin, sawi ho a nih hnuah lungrual taka pawm a ni a. LMC Budget 2025-2026 atan hian cheng vaibelchhe 24, nuai 63. sing 9, sang 7 ruahman a ni a. Tax leh Non-Tax Revenue aṭangin cheng vaibelchhe 20, nuai 86 sing 7 leh sang 3 bakah Capital Receipt-ah cheng vaibelchhe 3, nuai 77, sing 2 leh sang 4 hmuh beisei a ni. LMC BoC ṭhukhawm chuan kumin 2025 aṭang hian LMC huamchhungah bawlhhlawh awm lohna 'Garbage Free City Lunglei Project' kalpui tura relin, ward number 1, 2, 9 leh 11 te a hmahruai a kalpui atan ruahman a ni a. Kum tin ward dangah kalpui belh zelin, kum 3 chhungin ward 11 tuam chhuah tum a ni a. State sawrkar sum leh Urban Local Body sum aṭanga hma lak dan ngaihtuah ni se,an ti.

Mizoram sawrkarin LMC chu property tax 2024 -2025 khawn phalna a pek tawh angin inbuatsaih mek a nih thu tarlan a ni a. Property tax khawn tur chungchang hi mipuih inhrilhfiyah hmasak ni se, property tax khawn chu mipui hnenah a luang let tih mipuiin an hriat chian theih nan kawng hrang hrangin mipui zirtir ni se,an ti a, Property Tax khawn dan tur inkaihhruaina siam rem nghal niin, Ward Committee kal tlangin Ward hmasawwna atan za zela 80, Local Council kal tlanga hmasawwna hna thawh nan za zela 15 leh LMC-ah za zela 5 lut tura siam rem a ni a. Dan hmasaah chuan Ward Committee-ah za zela 80, LC-ah za zela 5 leh LMC-ah za zela 15 tih niin, LMC leh LC te chanpual hi thlakthleng a ni.

Nikum chhung khan parking fee aṭangin cheng nuai 18, sing 3, sang 1 leh 349 khawn chhuah a nih thu tar lan a ni a. LMC BoC ṭhu khawm chuan hei hi a bo a bang awm lova mipui tana hman ni se tiin, Lunglei khawpui chhung traffic marking leh mamawh bakah kawngpui siamna atan hman ni se, an ti a. LMC huam chhunga ui leh vawkh khuahkhirhna dan hman lailawk tur chu pawmin, LMC hnuaia co-terminus-a thawkte Medical leh TA bill theihna tur ruahmanna an pawm bawk.

LMC Board of Councillor ṭhut khawmah hian councillor 11 an tel kim a. LMC Chief Executive Officer Pu Donny Lalruatsanga leh Secretary Pi Zoramdini te'n an telpui bawk a ni.

